

INUIT ATAQATIGIIT

Inatsisartuni



UKA 2018/108
23.10.18.
Peter Olsen

Inissianik attartortitsisarneq pillugu Inatsisartut peqqussutaani nr. 2-mi, 12. maj 2005-imeersumi ilanngussaq 4 (Ileqqorissaarnissamut malittarisassat) allanngorteqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasillunga tunngaviusumik pisortat inissiaataanni qimmeqarnissaq aamma/imaluunniit qitsuuteqarnissaq akuerineqarsinnaalersillugu.

(Inatsisartunut ilaasortaq Randi Vestergaard Evaldsen, Demokraatit)

Siullermik, Randip siunnersuutaa oqaaseqarfigilinnginnerani piffissaq manna iluatsillugu kalaallit qimmitta, nunarsuarmi kisiartaalluni akuneqarsimanngitsuusup ullumikkut ullutsinni atugassarilersimasai pillugit Inuit Ataqatigiinniit ernumassuteqalersimanerput oqariartuutigeqqaarusupparput. Kalaallit qimmitsinnut ullumikkut ittumik isiginnittaaseqalersimanerput Inuit Ataqatigiinniit aarlerinartutut ernumanartutullu isigaarput.

Ukiuni untritilikkaani qimmeq taanna qanittuaraallugu najortigiuarsimasarput, ullumikkut ullutsinni akornutitut, tukassaasutut iperterisutullusooq isigalugu, illoqarfinni amerlanerpaartaani ajoraluartumik inuit akornanniit qimagutsinneqaraluttuinnarpoq, illoqarfiullu avataannut inissinneqaleraluttuinnarluni.

Inoqarfiup iluaniit inoqarfiup avataanut, kalaallit qimmitta inissinneqaraluttuinnarnerat Inuit Ataqatigiinniit pitsaanngilluinnartutut, peqqinnanngilluinnartutullu isigaarput pissutigalugu qimmip inuit akornanniit qimagutsinneqarneratigut kingunerisinnaasai pitsaanngitsut ernumassutigisinnaasavut ilaatigut makku taaneqarsinnaammata:

1. Qimmit nujuartanngoraluttuinnarlutik inunnut ulorianarsigaluttuinnarsinnaanerat
2. Qimmip piginnittullu akornanni ulluinnarni attaveqatigiittarnissaat pingaaruteqarluinnarpoq, illoqarfiullu avataanut inissiigaluttuinnarnerup tamanna innarlarsinnaavaa
3. Ulluinnarni isumagineqartarnerat, nerisinneqartarnerat, imertinneqartarnerallu innarlerneqangaatsiassaaq.

Tamanna pillugu Inuit Ataqatigiinniit kommunit kalaallit qimmiinik qimmeqarfiusut kaammattorusuppagut kalallit qimmitta ulluinnarni atugarisaannik pitsanngorsaataasinnaasunik piaartumik iliuuseqarniaqqullugit, qimmillu illoqarfiup avataanut inissinneqartalernissannik aalajangersimanerminnik eqqarsaqqilaaqqullugit.

Inatsisartunut ilaasortap Randi V. Evaldsenip siunnersuutaanut tunngatillugu, nalunngilarput ullumikkut illoqarfinni qallunaat qimmiinik qimmeqarfiusuni, qallunaat qimmiinik qimmeqarnissaminnik nuannarisqaartunik pingaartitsisunillu ulikkaartoq.

Ima nuannaritigaat pingaartitsigaallu allaat qitornamittut pillugit qitornamittullu asatigalugit misigissuseqarfigalugillu inooqatigalugillu najugaqatigisaraat. Inuit kiserliortut, kiserliornaveersaatitut aamma atorniarlugu qimmersaartoqartarpoq, ilaasa inoqutissatut illersortissatulluunnit aamma atorniarlugu qimmitaartoqartarluni.

Tamanna pillugu paasilluarparput sooq Randi V. Evaldsen taamatut siunnersuuteqarsimanera.

Maleruaqqusanik allannguisoqarsinnaanera oqaloqataaffigisinnaavarput taamatut allannguiarnermi ineqartut qanimut suleqatigineqarsinnaappata.

Ineqartut qulaatiinnarlugit allannguisoqarnissaa Inuit Ataqtigiinniit kissaatiginngilarput. Pingaartipparput allannguiarnermi ineqartut susassaqtullu allat tamaasa qanimut peqataatinneqarnissaat.

Tamanna pillugu Randi V. Evaldsenip siunnersuutaa ataatsimiititaliamut ingerlateqqipparput maleruaqqusanik allannguisinnaaneq sussaqtut tamaasa suleqatigalugit qanoq aaqqissuunneqarsinnaanersoq qulaajaaffigisinnaaqqullugu

Qujanaq